

NO. SOALAN: 151

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : DATUK BUNG MOKTAR BIN RADIN
(KINABATANGAN)**

TARIKH : 10 JUN 2014

RUJUKAN : 6837

SOALAN:

Datuk Bung Moktar bin Radin (Kinabatangan) minta MENTERI DALAM NEGERI menyatakan tindakan yang telah dan yang akan diambil oleh pihak Kerajaan dalam menangani masalah kebanjiran Pendatang Asing Tanpa Izin (PATI) di negeri Sabah yang dikhuatiri akan menimbulkan lebih banyak keskes jenayah. Apakah mekanisme yang akan digunakan dalam memastikan bilangan PATI yang terlalu ramai di Sabah ini dapat dikurang ataupun disifarkan.

JAWAPAN:

Tuan Yang di-Pertua,

Kementerian Dalam Negeri (KDN) dan agensi-agensi penguatkuasa di bawahnya, khususnya Jabatan Imigresen Malaysia (JIM) sentiasa memberi perhatian serius terhadap kehadiran pendatang asing tanpa izin (PATI) di negara ini. Tindakan penguatkuasaan seperti tangkap, dakwa dan usir terhadap PATI sentiasa menjadi agenda utama KDN. Operasi Bersepadu ini melibatkan agensi - agensi dalam Kementerian Dalam Negeri (KDN) seperti Jabatan Imigresen, PDRM, RELA, JPAM, Jabatan Pendaftaran Negara (JPN) dan agensi-agensi lain iaitu Suruhanjaya Pencegahan Rasuah Malaysia (SPRM), Pihak Berkuasa Tempatan (PBT), Agensi Penguatkuasaan Maritim Malaysia (APMM), Angkatan Tentera Malaysia (ATM), dan lain-lain.

Operasi Bersepadu bagi memburu PATI secara besar-besaran ini akan dijalankan secara berterusan. PATI yang ditahan akan dihantar pulang ke negara asal dan kos ditanggung oleh pekerja, majikan atau kedutaan. Kerajaan tidak akan menanggung sebarang kos penghantaran pulang PATI. Operasi akan dijalankan secara berterusan bagi menguatkuasakan Akta Antipemerdagangan Orang Dan Antipenyeludupan Migran 2007, Akta Imigresen Malaysia 1959/63, Akta Pasport 1966 dan Peraturan-Peraturan Imigresen 1963.

Dari tahun 2012 hingga April 2014, Jabatan Imigresen Negeri Sabah telah menjalankan sebanyak 1,708 Operasi dan telah memeriksa seramai 35,049 orang yang disyaki PATI dan seterusnya menangkap seramai 12,598 orang warga asing atas pelbagai kesalahan. Daripada jumlah yang ditangkap, seramai 7,299 orang telah diambil tindakan mahkamah manakala selebihnya diambil tindakan usir balik ke negara asal mereka.

Dalam hal ini, Kementerian telah mengambil beberapa langkah dan inisiatif bagi membendung masalah PATI di negara ini terutama di Sabah seperti berikut:

- i) memperketatkan kawalan dan pemeriksaan di pintu-pintu masuk ke negara;
- ii) menasihatkan pelawat-pelawat asing ke negara ini agar mempunyai tiket pulang ke negara asal mereka (*return ticket*) di samping menasihatkan mereka agar mempunyai sumber kewangan yang mencukupi untuk menyara diri sepanjang masa berada di negara ini;
- iii) mempertingkatkan pengawasan di sepanjang pesisiran perairan negara, iaitu kawasan-kawasan yang telah dikenal pasti sebagai tempat pendaratan dan kemasukan PATI. Ini dijalankan dengan kerjasama Pasukan Gerakan Marin PDRM, Tentera Laut Diraja

Malaysia (TLDM) dan Agensi Penguatkuasaan Maritim Malaysia (APMM);

- iv) Mengadakan engagement dengan penduduk setempat dan ketua masyarakat dalam perkongsian maklumat mengenai keberadaan PATI;**
- v) memantapkan usaha-usaha risikan, pemantauan dan penguatkuasaan bagi menyekat penyeludupan manusia di sempadan darat negara. Ia dijalankan dengan kerjasama Polis Diraja Malaysia (PDRM), Unit Pencegah Penyeludupan (UPP) dan Pasukan Gerak Am (PGA);**
- vi) melaksanakan operasi penguatkuasaan secara bersepadu bersama agensi-agensi yang berkaitan dari masa ke semasa secara berterusan untuk mengesan, menangkap, mendakwa dan mengusir warganegara asing yang melanggar peruntukan undang-undang negara seperti di bawah Akta Imigresen 1959/63, Akta Pasport 1966 dan Peraturan-Peraturan Imigresen 1963; dan**
- vii) membuat naziran ke premis-premis yang terdapat warganegara asing, seperti kawasan luar bandar, kawasan bandar dan premis majikan yang menggaji pekerja asing serta institusi yang mengambil pelajar antarabangsa.**

Keberadaan warganegara asing di negara ini tidak hanya menjadi tanggungjawab suatu pihak sahaja tetapi sebaliknya melibatkan peranan pelbagai agensi dan pihak, termasuklah rakyat negara ini. Semua rakyat Malaysia perlu turut serta dalam membanteras kehadiran PATI dengan tidak memberi perlindungan kepada mereka atau menyewakan premis atau harta benda kepada PATI atau menggaji PATI. Tidak boleh dinafikan, terdapat rakyat kita sendiri yang menjadi *culprit* yang melakukan sesuatu berlandaskan kepentingan peribadi tanpa memperdulikan keselamatan dan kesejahteraan negara.

Selagi rakyat Malaysia sendiri bersubahat dengan PATI, adalah sukar bagi agensi penguat kuasa untuk menyekat kemasukan atau mengurangkan keberadaan PATI di dalam negara. Namun begitu, usaha-usaha berterusan dan gigih akan terus dilaksanakan oleh Kerajaan demi memastikan kesejahteraan rakyat negara ini tidak dimudaratkan oleh keberadaan warga asing.

NO. SOALAN: 152

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

DARIPADA : TUAN LIM LIP ENG [SEGAMBUT]

TARIKH : 10 JUN 2014

RUJUKAN : 6838

SOALAN:

Tuan Lim Lip Eng [Segambut] minta **MENTERI DALAM NEGERI** menyatakan statistik kes culik sejak tahun 2010 mengikut tahun, negeri penculikan berlaku dan warganegara mangsa. Berapa orang mangsa culik diselamatkan dan adakah Kerajaan patut mohon maaf kepada keluarga mangsa culik yang berwarganegara asing.